

SEMARAKKAN BUDAYA MEMBACA DALAM MASYARAKAT

Oleh: Nor Hasniah binti Jaafar, 1172549,

Fakulti Pengajian Bahasa Utama (FPBU), Universiti Sains Islam Malaysia (USIM)

Disiarkan pada 23 Ogos 2020



Amalan membaca sangat dititikberatkan dalam masyarakat kerana tanpa membaca hilanglah ilmu di dada.

Ketahuilah bahawa pendidikan sangat penting untuk mencapai kecemerlangan dalam segala aspek.

Untuk mencapai pendidikan yang cemerlang kita haruslah membaca kerana ia merupakan jambatan untuk memperoleh segala ilmu pengetahuan.

Oleh itu, kita perlu membudayakan diri dengan membaca untuk menambah ilmu pengetahuan. Amalan membaca sering dibahaskan sepanjang zaman, malah ia juga sering diabaikan kerana tiada rasa minat serta dorongan kepada diri untuk membaca walaupun hanya satu muka surat.

Membaca juga didefinisikan sebagai menuntut ilmu. Menuntut ilmu merupakan suruhan yang wajib dilaksanakan.

Pada masa yang sama, masyarakat perlu lebih memahami secara jelas hubungan antara membaca dan menuntut ilmu. Tanpa membaca kita tidak akan memperolehi ilmu pengetahuan.

Kewajiban menuntut ilmu turut dinyatakan dalam al-Quran seperti firman Allah SWT yang bermaksud, “Wahai orang-orang beriman apabila dikatakan kepadamu ‘Berlapang-lapanglah

dalam majlis', maka lapangkanlah nescaya Allah akan memberi kelapangan untukmu. Dan apabila dikatakan: 'Berdirilah kamu', maka berdirilah, nescaya Allah akan meninggikan orang-orang yang beriman di antaramu dan orang-orang yang diberi ilmu pengetahuan beberapa darjat. Dan Allah Maha Mengetahui apa yang kamu kerjakan". (Surah al-Mujadilah, ayat 11)



Amalan membaca haruslah menjadi satu budaya dalam kehidupan. Budaya membaca tidak hanya dalam kehidupan sebagai pelajar, malah tiada batasan kepada sesiapa sahaja dan di mana mereka berada.

Amalan membaca amat penting agar masyarakat tidak ketinggalan dalam arus yang moden akibat kurang ilmu pengetahuan.

Bagi pelajar di sekolah rendah, sekolah menengah dan universiti, terdapat perpustakaan yang menyediakan pelbagai jenis buku serta bahan bacaan akademik dan ilmiah untuk memudahkan mereka membuat rujukan di samping menambah ilmu pengetahuan.

Adalah amat penting kita memilih bahan bacaan yang berkualiti dan memberi manfaat khususnya dari segi ilmu yang boleh digunakan untuk memajukan diri dalam zaman serba canggih ini.

Sebaik-baiknya tanam minat membaca dalam diri anak-anak sejak mereka kecil agar amalan yang baik ini terus subur sehingga mereka dewasa.

Bawalah mereka mengunjungi perpustakaan dan pesta buku agar anak-anak didedahkan dengan dunia buku sejak dari usia muda.

Apabila anak-anak menunjukkan prestasi yang cemerlang di sekolah, ibu bapa boleh menghadiahkan mereka dengan buku-buku yang sesuai dengan kegemaran mereka.

Insyallah, langkah ini akan memastikan generasi muda terus mewarisi tabiat gemar membaca yang merupakan salah satu ciri bangsa yang maju dan berjaya.